



**REPUBLIKA E SHQIPËRISË
-AUTORITETI I KONKURENCËS-
Komisioni i Konkurrencës**

V E N D I M

Nr. 183 Datë 29.03. 2011

“Mbi

autorizimin e përqendrimit të realizuar nëpërmjet shit-blerjes së 51% të aksioneve të shoqërisë Capital Sh.a. nga shoqëria Sigal Life Uniqa Group Austria Sh.a”

Komisioni i Konkurrencës me pjesëmarrjen e :

- Znj. Lindita Milo (Lati) Kryetar
- Znj. Servete Gruda Anëtar
- Z. Koço Broka Anëtar
- Znj. Rezana Konomi Anëtar

në mbledhjen e tij të datës 29.03.2011, shqyrtoi çështjen me :

Objekt: Autorizimin e përqendrimit të realizuar nëpërmjet shit-blerjes së 51% të aksioneve të shoqërisë Capital Sh.a, nga shoqëria Sigal Life Uniqa Group Austria Sh.a.

Baza ligjore: Ligji nr. 9121, datë 28.07.2003 “Për mbrojtjen e konkurrencës”, neni 24, shkronja d, nenet 10-12, dhe 16-17, në veçanti Kreu III “Përqendrimet e Ndërmarrjeve” nenet 53-56, 58, Rregullorja “Për zbatimin e procedurave të përqendrimit të ndërmarrjeve”, Udhëzimi “Për formën e njoftimit të përqendrimit dhe mundësinë për njoftim të thjeshtuar” dhe Formulari “Për njoftimin e përqendrimit”.

Komisioni i Konkurrencës, pas shqyrtimit të raportit mbi njoftimin e përqendrimit Sigal Life Uniqa Group Austria Sh.a - Capital Sh.a, dhe relacionit të Sekretarit të Përgjithshëm,

V Ë R E N S E:

1. Transaksioni dhe përqendrimi

Transaksioni i shitblerjes së 51% të aksioneve të shoqërisë Capital Sh.a, nga shoqëria Sigal Life Uniqa Group Austria Sh.a, është realizuar nëpërmjet ‘Marrëveshje Blerje Aksionesh’ të datës 15 Dhjetor 2010, e nënshkruar nga palët Sigal Life Uniqa Group Austria Sh.a dhe Avel Sh.p.k në cilësinë e shitësit.

Shoqëria Sigal Life Uniqa Group Austria Sh.a blen me anë të kësaj kontrate 51% të aksioneve me të drejtë vote të shoqërisë Capital Sh.a dhe përfton kështu kontrollin në këtë të fundit.

Transaksioni i realizuar ndërmjet palëve pjesëmarrëse në kuptim të nenit 10/1/b të Ligjit, është ndryshim kontrolli në formën ndryshimit të pronësisë. Gjithashtu përqendrimi njoftuar përmbush edhe kushtet e nenit 12 të Ligjit për sa i përket xhirove (neni 12/1) dhe është njoftuar brenda afatit të parashikuar (neni 12/2).

2. Palët në transaksion:

- **Sigal Life Uniqa Group Austria Sh.a**, një shoqëri aksionare, e themeluar dhe që ushtron aktivitetin e saj në përputhje me legjislacionin shqiptar në fushën sigurimit të jetës, në cilësinë e **Blerësit** të pjesës prej 51% të kapitalit aksionar të shoqërisë Capital Sh.a. Veprimtaria kryesore e shoqërisë është sigurimi dhe risigurimi i Jetës si dhe çdo veprimtari që i shërben kryerjes sigurimit dhe risigurimit të Jetës.
- **Capital Sh.a**, është një shoqëri aksionere e themeluar dhe që funksionon në përputhje me legjislacionin shqiptar në fushën e pensioneve private, është shoqëria **objekt i transaksionit**. Shoqëria ushtron veprimtarinë në fushën e mbledhjes dhe investimit të fondeve të pensioneve, për ofrimin e përfitimeve të pensionit për personat që bashkohen në fondin e pensionit.
- **Avel Sh.p.k**: është një shoqëri me përgjegjësi të kufizuar, e themeluar dhe që funksionon në përputhje me legjislacionin shqiptar, në cilësinë e **Shitësit** të pjesës prej 51% të kapitalit aksionar të shoqërisë Capital Sh.a me të drejtë vote. Shoqëria ushtron veprimtarinë e saj në sektorin e shitblerjes së automjeteve dhe riparimit të tyre.

3. Përshkrimi i transaksionit

Transaksioni i shitblerjes së aksioneve është realizuar në bazë të "Marrëveshje Blerje Aksionesh" të datës 15 Dhjetor 2010, me qëllim transferimin e pjesës prej 51% të kapitalit aksionar të shoqërisë Capital Sh.a tek Sigal Life Uniqa Group Austria Sh.a, e nënshkruar nga palët.

Transaksioni është kryer për efekt të dispozitave ligjore, më konkretisht **neni 20 të Ligjit Nr. 10 197, date 10.12.2009 "Për fondet e pensionit vullnetar" ku përcaktohet se të paktën 51 % të aksioneve në një shoqëri administrimi të fondeve të pensioneve duhet të zotërohen nga shoqëri sigurimi jete ose banka**. Ai konsiston në përfitim të kontrollit nëpërmjet blerjes së 51% të aksioneve me të drejtë vote nga Shitësi tek Blerësi. Transaksioni do të përfundojë me përmbushjen e kushteve dhe detyrimet e marra përsipër në lidhje me garancitë e bëra nga palët.

4. Xhiro për vitin 2009

I. Xhiro totale në tregun ndërkombëtar është xxxxx Lek dhe përbëhet nga xhiro e:

- **Uniqa Versicherung AG** për vitin 2009 = xxxx Euro⁽¹⁾ ose xxxxx Lek.

II. Xhiro totale në tregun e kombëtar është xxxx Lek dhe përbëhet nga xhiro e:

Capital sh.a për vitin 2009 = xxxx lek;

Avel sh.p.k për vitin 2009 = xxxx lek;

Sigal Life Uniqa Group Austria për vitin 2009 = xxxx lek;

Sigal Uniqa Group Austria për vitin 2009 = xxxx lek.

Palët në transaksion plotësojnë kriteret e xhiros të përcaktuara në nenin 12, pika 1 të ligjit “Për mbrojtjen e konkurrencës” dhe si rrjedhojë, ky transaksion është objekt autorizimi nga Komisioni i Konkurrencës.

5. ANALIZA E KONKURENCËS

5.1. TREGU PËRKATËS

Referuar nenit 3, pika 7, të Ligjit, përcaktimi “treg përkatës”, përfshin dy komponentë:

a) tregu i produktit, dhe

b) tregu gjeografik.

5.1.a Tregu i produktit:

Referuar Udhëzimit të Komisionit të Konkurrencës, Nr. 76, datë 07.04.2008 , “Për përcaktimin e tregut përkatës”, si dhe mbështetur në veprimtarinë e palëve, treg përkatës do të konsiderohet *tregu i pensioneve private vullnetare*.

Shoqëria Sigal Life Uniqa Group Austria sh.a, ofron produkte sigurimi për të gjitha klasat e jetës.

Capital sh.a, është fond pensioni, i cili përbëhet nga një grup asetesh në pronësi të anëtarëve të fondit. Në asetet e fondit përfshihen kontributet e derdhura dhe fitimi neto i realizuar nga investimi i tyre.

Ekzistojnë dy lloje fondesh pensioni:

- 1) Fondi i pensionit vullnetar,
- 2) Fondi i pensionit profesional

5.1.b Tregu përkatës gjeografik:

Ky treg përfshin hapësirën ku tregtohen produktet apo shërbimet e ofruara të përcaktuara në tregun e produktit.

¹ Kursi i këmbimit për vitin 2009, 1 Euro = 132.0475 Lek; Burimi: Banka e Shqipërisë.

Shoqëria 'Capital sh.a' ushtron aktivitetin e saj në të gjithë territorin e Shqipërisë, ku prurjet më të mëdha të kontributeve janë nga qytetet e mëdha, si Tirana, Durrësi, Vlora, Saranda, Korça etj.

Sa më sipër, në vlerësimin e këtij përqendrimi, tregu përkatës gjeografik është konsideruar tregu kombëtar.

5.2. Struktura e tregut para përqendrimit.

Tregu i pensioneve private është një treg i cili mbikëqyret nga ana e Autoritetit të Mbikëqyrjes Financiare (AMF). Ai mbetet ende një treg i vogël parë kjo si nga këndvështrimi i numrit të kontribuesve ashtu edhe nga sasia e kontributeve përgjatë viteve, krahasuar kjo dhe me numrin dhe volumin e kontributeve pranë ISSH-së. Ky treg aktualisht konsiderohet si një treg në fazat fillestare të tij dhe mund të thuhet se paraqet një treg me potencial të madh për të ardhmen. Deri sot këtë treg e mbulojnë me aktivitetin e tyre vetëm tre shoqëri, të cilat zotërojnë pjesë të konsiderueshme të tregut dhe në përbërje të të cilëve nuk është futur as 5% të tij.

Duke pasur parasysh numrin e shoqërive të cilat ushtrojnë aktivitetin e tyre në këtë treg, por edhe nga pjesët e tregut të zotëruara nga këto shoqëri, mund të thuhet se tregu i pensioneve private vullnetare është një treg me përqendrim të lartë

Shoqëria "Capital" zë pjesën më të madhe të tregut si për vitin 2009, ashtu edhe për vitin 2010, nëse i referohemi numrit të kontribuesve, me përkatësisht 40.05% dhe 43.89% të numrit total të tyre, ndërsa për sa i përket volumit të kontributeve të akumuluar ajo renditet si shoqëria e dytë në treg, pas shoqërisë Raiffeisen Pensions.

Por pavarësisht zhvillimeve pozitive që ka pësuar tregu gjatë viteve të fundit, numri i kontribuesve për vitin 2010 rezulton vetëm 4992, me një vlerë mesatare kontributesh prej afërsisht 22420 lekë në vit/kontribues, ose 1868 lekë në muaj/kontribues.

5.3. Struktura e tregut pas përqendrimit

Përqendrimi nuk ndryshon strukturën e përgjithshme të tregut të pensioneve private vullnetare në Shqipëri, pasi ai lidhet vetëm me ndryshimin e strukturës së zotërimit të aksioneve brenda shoqërisë "Capital".

Pas përqendrimit, në tregun e pensioneve private vullnetare do të vazhdojnë të ushtrojnë aktivitetin e tyre tre kompani: Raiffeisen PENSIONS; Sigal Life Uniqa Group Austria dhe Sigma IPP.

6. Vlerësimi i konkurrencës pas përqendrimit

Tregu i pensioneve private është një treg i cili mbikëqyret nga ana e Autoritetit të Mbikëqyrjes Financiare (AMF). Përqendrimi nuk ndryshon strukturën e përgjithshme të tregut të pensioneve private vullnetare në Shqipëri, pasi ai lidhet vetëm me ndryshimin e strukturës së zotërimit të aksioneve brenda shoqërisë "Capital".

Ai mbetet ende një treg i vogël edhe pas përqendrimit, parë kjo si nga këndvështrimi i numrit të kontribuesve ashtu edhe nga sasia e kontributeve përgjatë viteve.

Duke pasur parasysh numrin e shoqërive të cilat ushtrojnë aktivitetin e tyre në këtë treg, por edhe nga pjesët e tregut të zotëruara nga këto shoqëri, mund të thuhet se tregu i pensioneve private vullnetare është një treg me përqendrim të lartë.

Pas përqendrimit, në tregun e pensioneve private vullnetare do të vazhdojnë të ushtrojnë aktivitetin e tyre tre kompani: Raiffeisen PENSIONS; Sigal Life Uniqa Group Austria dhe Sigma IPP.

Përqendrimi i realizuar nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

PËR KËTO ARSYE

Në bazë të nenit 24, shkronja d, dhe nenit 56 pika 1, të Ligjit nr. 9121, datë 28.07.2003 “Për mbrojtjen e konkurrencës”:

VENDOSI:

1. Të autorizojë përqendrimin e realizuar nëpërmjet shit-blerjes së 51% të aksioneve të shoqërisë Capital Sh.a, nga shoqëria Sigal Life Uniqa Group Austria Sh.a.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

KOMISIONI I KONKURRENCËS

Servete GRUDA

(_____)

Anëtar

Koço BROKA

(_____)

Anëtar

Rezana KONOMI

(_____)

Anëtar

Lindita MILO (LATI)

(_____)

K R Y E T A R